



Šumska šljuka - šljuka "bena"  
(*Scolopax rusticola linne*)

## Treba prikupiti sve podatke

"Pernata šumska kraljica" je naslov teksta autora Velida Delića u "Lovačkom listu" od jula 1998. godine iz kojeg se može saznati da ova vrsta šljukarica ne obitava, tačnije da se ne gnijezdi u lovištima Bosne i Hercegovine. U "Fauni Evrope" autora Dr. Harry Gamsa se navodi da je to samo divljač u preletu i to sezonskom (proljeće - jesen) iz skandinavskih zemalja ka jugu Evrope.

Moja prva saznanja su bila iz lovačkih listova i stručne literature. U predratnom periodu, prilikom obilaska pjevališta tetrijeba pred odstrijel, nerijetko sam, naročito na području padina Vranice, susretao šljuke u lovištu. Dešavalo se to u jutarnjem i večernjem preletu kada su se oglašavale karakterističnim i jedinstvenim "pssip" i "kuor".

Velid Delić, uz dužno poštovanje za njegov trud i stručne priloge, tvrdi da su rijetki slučajevi gniježdenja šumske šljuke u lovištima Bosne i Hercegovine. Moja saznanja su drugačija. Ove godine, u

lovištima i područjima gdje sam boravio po službenoj dužnosti, uočio sam na području Vranice blizu izvora Zlatan potoka i Ravne planine na platou Vlašića u preletu na oba lokaliteta od pet do 10 šljuka samo u jednom pravcu. To je bilo krajem juna i početkom jula ove godine iz čega se može izvesti zaključak da u našim lovištima ima autohtone šumske šljuke. Pomenuti predjeli su slični onima u sjevernoj Evropi gdje ima najviše četinarske šume sa dosta vlage.

Sedamdesetih godina, kada sam pohađao srednju školu na Ilidži, na Igmanu su, za vrijeme naše proljetne praktične nastave, pronadani ptići šumske šljuke od kojih je jedan bio prepariran na mijeh.

Vjerujem da ima lovaca koji pomno prate migraciona kretanja pernate divljači i ostalih korisnih ptica u Bosni i Hercegovini. Moja želja je da se prikupi što više relevantnih podataka od njih i da njihova zapažanja budu objavljena u ovom našem listu.

*Slobodan Ličanin*

